


[www.BibleForChildren.org](http://www.BibleForChildren.org)




उत्पत्ति 6




नोआए ताँमैं चुन् ग। चए पलोर नोआ  
मत्त्रे छयाँबै के लबै म्हि मुँल। च  
परमेश्वरने बा-बालुन् प्रमल। छले  
पृथ्वीबै म्हिमैं सैब् म्लोब् नेरो  
आछयाँबै के लब परमेश्वरजी म्माँइ।  
तलेबिस्याँ पृथ्वीबै ताँन् म्हिमैंए सैं  
दुष्ट तल् खाँल।




छतसि परमेश्वरजी नोआने बिड़, “डइ ताँन्  
म्हिमें नास लवाबै सैं लल् खाँइमुँ। तलेबिस्याँ  
चमैंड लबै आछयाँबै केमैंड पृथ्वी प्लिंइमुँ।  
छतसि डइ चमैंलाइ पृथ्वीउँइले नास लवाम्।”



“छतसि विहइ गोपेर बिबै सिंग क्यु झाज घि  
बनेद्। झाजर कोठा-कोठा लसि च न्होंर नेरो  
फिर अलकत्राइ स्यालद्।”




विहइ च झाज छले बनेदुः  
झाज प्रसे प्लिच्यु मिटर  
ह्लिब, इहस्युसे सों मिटर  
पल्हाब नेरो च्युसे इहं  
मिटर  
नुब लद्।



“ह्रोंसए ल्हागिर नेरो ताँन्  
खालर्बै सो प्हयाबै सैमैङ् चबै  
ल्हागिर ताँन् खालर्बै चबै सै  
पसि विहने बालु थेंन्।”




“झाइले सो प्ह्याबै ताँन् खालबै त्होब नेरो माँमा फ्हिने बालुन्  
सोरिगे बिसि तिजोर-तिजोर क्यु झाजए न्होंर पखो।”




झाइले ताँन् खालबै चल् तबै खेदोमें न्होंबै  
त्होब नेरो माँमा डिजोर धै चल् आतबै  
खालबै खेदोमें त्होब नेरो माँमा तिजोर क्यु  
झाजर पखो।






नाँ बाडिउँइले सोरिगे बिसि  
नोआ, चए प्हेँस्यो, च्ह-चोंमें  
क्यु झाज न्होंर होंइ।





नोआ टुब्ब्रा बर्ष तबै सालबै म्हैन ड्हिंबै  
च्युसे डिंगै तमा मुँडैले नाँ युबै युबन् तइ। धै  
पृथ्वी न्होंबै थे-थेबै क्युए मुल्में तान् त्होंयाँइ।





छले पृथ्वीर प्लिच्यु त्हिंइ प्लिच्यु  
म्हुँइस नाँ युबै युबन् तइ।




नाँ युबै युब् तरिमा पृथ्वीर  
क्यु बेल्ले ल्हें तसि क्यु झाज  
क्यु फि-फि क्वेबर होंइ।




पृथ्वीर नाँ युबै युबन् तमा क्यु बेल्ले ल्हें तसि नुब नुबै कोमें  
ताँन् प्ल्हँयाइ। छले पृथ्वीर मुँबै सो प्ल्याबै सैमें ताँन् सियाइ।



दिलेया परमेश्वरजी नोआ नेरो चने बालु  
क्यु झाजर मुँबै ताँन् धिर न्हबै खेदोमें नेरो  
कह्योँबै खेदोमें मैसि पृथ्वीर खें कुल्मिंइ। धै  
क्यु इहारबर होंइ।






च लिउँई “सर क्यु  
इहारइ उ” बिसि इह्योबर  
नोआइ तोंगु (ढुकुर) घि  
या प्हुर्मिंइ।




म्हैन इहिलबै इहस्युसे डिगैर स तांन् कारयाल। छतसि  
परमेश्वरजी नोआने बिड़, “विह, विहए प्हेंस्यो,  
चह-चौमैं तांन् झाजउँइले त्होंन्।”



झाड़ले नोआइ याहवेहए  
ल्हागिर खो पिंभै  
क्ल्हयो घि बनेसि  
चल तबै खेदोमें नेरो  
नमेंमें घि-घि किंसि  
परमेश्वरए मिर  
खो पिंइ।





परमेश्वरजी बिड़,  
“चु बाछा ड नेरो  
वहेमैं धै वहेमैंने बालु  
मुँबै ताँन् सो प्ह्याबै  
सैमैंए म्हाँजोरि ताँन्  
पुस्तए ल्हागिर डइ लमिंइमुँ  
चए चिनु चु तब्मुँ।

डइ न्हाँम्स्योर ह्यागॉं  
थेंब्मुँ, झाइले ड नेरो  
पृथ्वीए म्हाँजोरि च  
ह्यागॉं बाछाए  
चिनु तब्मुँ।”




“डङ्ग पृथ्वीर  
न्हॉम्स्यो कुलमा  
न्हॉम्स्योर ह्यागॉ  
मौल्मुं,


ड नेरो क्हेमें धै सो  
प्ह्याबै ताँन सैमैए  
म्हॉजोरि फैबै बाछा  
डङ्ग मैल्मुं। धै नाँ बाडिइ  
धबै सो प्ह्याबै सैमै  
खोंयोइ सैरिब् आरे।”



च लिउँई परमेश्वरजी  
नोआ नेरो चए च्हमैं  
आशिक पिंसि “प्हारदै रोदै,  
सन्तानमैं ल्हें तदै पृथ्वीर  
प्लिंदै हयाद्,” बिड़।



झाजउँइले बैरु त्होंसि  
खबै नोआए च्हमैं शेम,  
हाम नेरो येपेत ग। हाम  
कनानए आबा मुँल।  
नोआए च्हमैं चु सौँलो  
मुँल। चुमैंउँइलेन् ताँन्  
पृथ्वी प्लियाँइ।



तलेबिस्‍याँ खीए च्हए फिर बिश्वास  
लब्‍में खाबै या नास आतरिगे, बरु  
खोंयोंइ आनुबै छह योंरिगे बिसि  
परमेश्‍वरजी ह्युलबै म्‍हिमेंने ल्हें  
म्‍हाँया लसि खीए घि दे  
मुँबै च्ह पिंइ।



रोमी 3:23

तलेबिस्याँ ताँन् म्हिइ पाप लइमुँ, छतसि  
खी डार फेनेल् आखाँइमुँ।

रोमी 6:23

तलेबिस्याँ पाप लबमैंइ योंबै नों सिब ग! दिलेया  
परमेश्वरजी छलेन पिंबै दान इयोए प्रभु येशू ख्रीष्टउँइले  
खोंयोँइ आखाँबै छह योंब् ग।

हिब्रू 9:27

ताँन् म्हिमें तिब्ले सिल् त्हुम्, धै सिबै लिउँइ  
परमेश्वरजी लबै इन्साफर राल् त्हुम्।



एफिसी 2:8,9

छतसि परमेश्वरए दयाम्हाँयाइ लमन् वहेमैँए बिश्वासउँइँले  
वहेमैँइ मुक्ति योंइमुँ। वहेमैँइ छयाँबै केमैँ लसि चु मुक्ति योंब  
आडिं, चुम् परमेश्वरजी छलेन पिंब् ग। छयाँबै केमैँ लसि  
म्हिमैँइ मुक्ति योंल् आखाँ। छतसि छयाँबै के लइ  
बिसि खाबै या थेब् प्हेँल् आत्हु।

रोमी 10:9,10

तलेबिस्याँ किहइ होंसए सुँइ “येशून् डए प्रभु ग” बिसि अरूलाइ  
साक्षि पिंम बिस्याँ, झाइले “परमेश्वरजी येशूलाइ सिबइले धबै  
सोगों लमिँइ” बिसि सैँर बिश्वास लम् बिस्याँ किहइ मुक्ति  
योंल्मुँ। तलेबिस्याँ इयोए सैँइ बिश्वास लसिन् इयो परमेश्वरए  
उँइँर ठिक ठदिम्, झाइले इयोए बिश्वास लबै ताँ  
अरूलाज्यै या बिमिँस्याँ इयोइ मुक्ति योंमुँ।



यूहन्ना 3:16,17

तलेबिस्याँ खीए च्हए फिर बिश्वास लब्में खाबै या नास आतरिगे,  
बरु खोंयोँइ आनुबै छह योरिगे बिसि परमेश्वरजी ह्युलबै म्हिमेंने  
ल्हें म्हाँया लसि खीए घि दे मुँबै च्ह पिंइ। तलेबिस्याँ ह्युलबै  
म्हिमें दोषि ठदिबर परमेश्वरजी होंसए च्हलाइ कुलब आडिं,  
दिलेया चमैलाइ जोगेबर कुल्मिंइ।

१ यूहन्ना 5:11-13

परमेश्वरजी पिंबै ग्वाइ चुन् गः खीजी इयोलाइ खोंयोँइ आखाँबै  
छह पिंइमुँ, धै च छह खीए च्हउँइले इयोइ योंम्। खाब्ने परमेश्वरए  
च्ह टिमुँ, चइ च छह योंइमुँ, दिलेया खाब्ने परमेश्वरए च्ह आटि,  
चइ खोंयोँइ आखाँबै छह आयों। ओ, परमेश्वरए च्हए फिर बिश्वास  
लब्में! कहेमैँइ खोंयोँइ आखाँबै छह योंइमुँ बिसि पक्का था सेरिगे  
बिसि डइ चु प्हिछया कहेमैँलाइ प्हिब् ग।



# उत्पत्ति 6 - 10

Storyline by: Edward D. Hughes

Illustrated by: Byron Unger, Lazarus  
and Alastair Paterson

Adapted by: M. Maillot; Tammy S.

Gorong Central Bible (gvr) © 2020, Wycliffe Bible  
Translators, Inc. All rights reserved.

<https://live.bible.is/bible/GVRWBT/MAT/1>

©2026 Bible for Children, Inc.

[www.M1914.org](http://www.M1914.org)

[www.bibleforchildren.org](http://www.bibleforchildren.org)

